

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : DATO' AR. WAN MOHAMMAD KHAIR-IL ANUAR  
BIN WAN AHMAD [ KUALA KANGSAR ]**

**TARIKH : 5 NOVEMBER 2015**

**SOALAN :**

**Dato' Ar. Wan Mohammad Khair-il Anuar bin Wan Ahmad [ Kuala Kangsar ]** minta **MENTERI PERUSAHAAN PERLADANGAN DAN KOMODITI** menyatakan apakah langkah-langkah terkini untuk Kementerian menangani kejatuhan harga getah dan sawit. Dan apakah bentuk-bentuk *safety net* pekebun-pekebun kecil di luar bandar.

## **JAWAPAN:**

Tuan Yang Di-Pertua,

Untuk makluman Ahli Yang Berhormat, harga getah dan sawit seperti harga komoditi lain bergantung kepada penawaran dan permintaan dan pertumbuhan ekonomi global. Sejak suku tahun ketiga 2014, harga getah dan sawit telah mengalami tren penurunan yang disumbangkan oleh antara lain, pertumbuhan ekonomi yang perlahan di negara-negara pengimport utama seperti China, Kesatuan Eropah dan Amerika Syarikat.

Tuan Yang Di-Pertua,

Bagi menstabilkan harga sawit, langkah-langkah yang telah dilaksanakan termasuk:

- i. Melaksanakan Program Biodiesel B7 (adunan 7% biodiesel sawit dan 93% diesel petroleum) di seluruh negara mulai November 2014. Program B7 akan menggunakan 575,000 tan minyak sawit setahun; dan
- ii. Menyediakan dana sebanyak RM 100 juta untuk Skim Insentif Tanam Semula 2015 (SITS 2015). Tujuan skim adalah untuk mengurangkan pengeluaran hasil buah sawit supaya menyumbang kepada penurunan paras stok minyak sawit dan seterusnya akan membantu peningkatan harga minyak sawit di pasaran;

- iii. Meningkatkan aktiviti penyelidikan dan pembangunan (R&D) dalam penghasilan produk-produk baru berasaskan sawit untuk dikomersialkan oleh pihak industri; dan
- iv. Memperkukuhkan pasaran eksport sedia ada serta menembusi pasaran-pasaran baru melalui misi promosi dan teknikal ke luar negara.

Selain itu, bagi membantu pekebun kecil sawit, Kementerian juga sedang mengkaji kesesuaian meluaskan mekanisme jaringan keselamatan sosial (*social safety net*) kepada sektor sawit.

Di peringkat antarabangsa, Malaysia bersama-sama Indonesia akan menjadi negara pengasas dalam penubuhan *Council of Palm Oil Producing Countries Council* (CPOPC). Tujuannya adalah untuk mengadakan kerjasama bagi menjamin pembangunan sawit serta menstabilkan harga sawit.

Tuan Yang Di Pertua,

Bagi sektor getah, Kementerian telah mengambil langkah-langkah bagi menangani isu penurunan harga getah termasuk:

- i. Merangka program menggalakkan pengeluaran lateks tempatan bagi mengurangkan kebergantungan kepada import, di samping dapat menjimatkan pertukaran wang asing;

- ii. Menyediakan *standard* berkenaan import bahan mentah bagi menjamin kualiti SMR yang dihasilkan; dan
- iii. Meningkatkan aktiviti-aktiviti penyelidikan dan pembangunan (R&D) untuk mempelbagaikan kegunaan getah serta meningkatkan penggunaan getah dalam negara seperti dalam pembinaan jalan raya.

Selain langkah-langkah tersebut, Kementerian akan terus berusaha untuk memperkukuhkan pasaran eksport sedia ada serta menembusi pasaran-pasaran baru bagi produk-produk berasaskan getah.

Di peringkat antarabangsa, di bawah rangka *International Tripartite Rubber Council* (ITRC), Malaysia bekerjasama dengan Thailand dan Indonesia bagi mencari pendekatan untuk menstabilkan harga getah asli dalam jangka masa panjang. Ini termasuk memperkukuhkan mekanisme *Supply Management Scheme* (SMS) dan *Agreed Export Tonnage Scheme* (AETS) di kalangan negara-negara ITRC.

Bagi membantu pekebun kecil getah, Kerajaan telah merangka jaringan keselamatan sosial (*social safety net*) dengan melaksanakan dua program seperti berikut:

- (i) Menyediakan skim bantuan khas sebanyak RM500 seorang secara *one off* kepada pekebun kecil getah di seluruh negara pada tahun 2013 dan 2014; dan

- (ii) Melaksanakan Insentif Pengeluaran Getah (IPG) mulai Januari 2015. Semasa pembentangan Belanjawan 2016 pada 23 Oktober 2015 yang lalu, Kerajaan telah mengumumkan untuk menaikkan Paras Harga Pengaktifan IPG daripada RM4.60 sekilogram kepada RM5.50 sekilogram atau apabila purata bulanan harga di ladang *cuplumps* mencecah RM2.20 sekilogram ke bawah.

Tuan Yang Di-Pertua,

Kementerian Perusahaan Perladangan dan Komoditi akan terus langkah-langkah jangka pendek dan panjang ke arah menstabilkan harga komoditi getah dan sawit. Ini adalah untuk memastikan para pengusaha tanaman getah dan sawit terutamanya pekebun kecil meraih faedah daripada usaha mereka.

Sekian, terima kasih.